

Epeso

Pauloŋe Epeso yenġât ekap kulemgum katyiŋgiop.

O bukulpne,

¹ Yen Epeso kapi ambolipŋaŋe Yesu Kiristohâlen biwiyenŋaŋe kepeim Anitâhât tem lâuwangim mansai. Nâ Paulo. Emelâk Anitâŋe nâŋgânihimu Yesu Kiristoŋe aposolo sâŋm âi nihiop ya mem mansan. Nâŋe heronŋe nâŋgâyiŋgim ekap yu kulemgum katyiŋgian.

² Awoŋnenŋe Anitâ yet Kutdânennenŋe Yesu Kiristo yâkŋe enġatyetŋeâk otmâ nâŋgâyiŋgim tihityeŋe otmutâ biwi nâŋgân nâŋgânyenŋaŋe kepeiakmâ konohâk otmâ sânduk sâekġât nâŋgâyiŋgim ulitguman.

Wâtġât mâmâŋahât Heakŋe mâmâŋe otningimu manman âlepŋahât bulâŋe teteningimap.

³ Anitâŋe ikŋe nanŋe, Kutdânenŋe Yesu Kiristo, hâŋgângumu ge nengât tosaġât otmâ muop. Yawu olop yakât otmâ nenŋe yâk orop biwinenŋaŋe kepeiakmâ konohâk otmu manmâ gain. Yakât otmâ Anitâŋe ikŋe Wâtġât mâmâŋahât Heak hâŋgângumu ge mâmâŋe otningimu manman âlepŋahât bulâŋe teteningim gap. Yakât nâŋgâm Anitâ mepaem mannom. ⁴⁻⁵ Anitâŋe ikŋahâk wawaenenekmap. Otmu nenŋe yâkât senŋan tosa barahâk kinnomġât nâŋgâm ikŋe nanŋe Yesu Kiristo hâŋgângumu ge nengât tosaġât otmâ mumbuap yakât emet inânŋan sâŋm kalop.

Yakât otmâ nenŋe Kiristohâlen biwinenŋe kepeimunŋe Anitâŋe tosanenŋe pilâningim nine nanne baratne sâm menenekmu mansain. Yakât nâŋgâm yâkŋe emet inânŋan hân himbim ki kândikyotgowân yawu tetewuap ya sâm kalop. ⁶ Otmu ikŋahâk wawaenenekmâ nengât sâm nanŋe hâŋgângumu giop yakât nâŋgâmunŋe hâu sâsâ otmâp. Yakât otmâ heronŋe nâŋgâwanŋim mepaem mânnom.

⁷⁻⁸ Kiristonŋe kawenenŋan kinmu kuŋetâ muop yâkâlen biwinenŋe katmunŋe Anitâŋe tosanenŋe pilâningiop. Otmu ikŋahâk wawaenenekmâ otningiop yakât nâŋgâmunŋe âlâ kândâkdâ otmâp. Yakât dop sâmune nâŋgâŋet. Nenŋe saru osomunŋe sililiŋ sâmâp. Yakât dopŋeâk Anitâŋe wawaenenekmâp ya ki pesuk sâwuap. ⁹⁻¹⁰ Anitâŋe âliwâhap topŋe topŋe, ehekŋe ki ehekŋe, himbimân ewan tap me hânân yu tap ya kerehâk kalop. Otmu sâp patoen Yura lohimbi otmu pâku lohimbi hârok menduhunenekbuap. Yawu otmâ âliwâhap topŋe topŋe kalop ya orowâk Kiristohât amutgen tatmunŋe kunnenŋe otmâ tatbuapgât sâm kalop. Yawu gârâmâ emelâk embânâmbâek yakât topŋe amokŋan tatmâ gaop. Yakât otmâ lohimbi nombotŋe yeŋe nâŋgân nâŋgân watmâ yakât topŋe nâŋgâne sâm pâpŋum gawi. Yâhâ nenâmâ Anitâŋe nâŋgân nâŋgânnenŋe mem pâronŋ pilâningimu yakât topŋe nâŋgâmain. Anitâŋe sâp kalop ya ikŋak ekmu ârândânŋ otmu den yakât bulâŋe tetem henŋenŋuwuap.

¹¹ Otmu Yura lohimbi nengât hohetnenŋan lok âlâ tetem kunnenŋe manmâ tihitnenŋe otbuapgât nâŋgâm Anitâŋe yakât pat kuningiop.

Yakât otmâ pat kuningiop yapâek nenñe lok ya tetem tihitnenñe otbuapgât nâñgâm biwinenñaje mem mambotbangim gawin. ¹² Otmu pat kuningiop yakât bulâñeâmâ Kiristoñe lohimbi kerek nengât tihitnenñe otbe sâñ Yura lohimbi nengâlen teteop. Nengâlen tetemu nenñe yâk orop biwinenñaje kepeiakmâ konohâk otmu yâkât pat otmâ mansain. Yakât otmâ Anitâhât nâñgâmunñe âlâ kândâkdâ otmu heronñe nâñgâwanñim mepaem mannom.

Manman kârikñan mannomgât nâñgâm engat yâhâp ki otmâin.

¹³ Kiristoñe lohimbi kerek nengât tosanenñahât otmâ ge kawenenñan kinmu kuñetâ muop. Yâkât den pat âlepñe ya nenñe yen pâku lohimbi ekyongomunñe nâñgâñetâ bulâñe olop. Den pat ya nâñgâñetâ bulâñe otmu yâkâlen biwiyenñaje kepeiwi. Yawu otbi yan Anitâñe meyekmâ nine nanne baratne sâñ manman kârikñahât pat nen Yura lohimbi kuningiop ya yen gurâ yawuâk kuyiñgiop. Yakât otmâ ikñe Wâtgât mâmâñahât Heak hâñgângumu ge lohimbi kerek mâmâñe otningiwuapgât sâñ kalop. Yakât otmâ ya hâñgângumu yenñgâlen ge mâmâñe otyiñgiop. ¹⁴ Otmu pat kuningiop yakât bulâñe sâp patoen menom nâñgâm Kiristohâlen biwinenñaje tiñâk kepeim mannom. Yawu manmunñe Wâtgât mâmâñahât Heakñe biwinenñan kioñmu pat yakât bulâñe menom nâñgâm engat yâhâp ki otmâ mannom. Yawu manmunñe sâp patoen Anitâñe menenekmâ ikñan torokatnenekmu manman

kârikñan manmâ herone otbanjim mepaem yâhâmbisâin.

Anitâ Wâtgât Ambonaje mâmâje otningimu kârihem kinmain.

¹⁵ Yeje Kutdânenje Yesu Kiristohâlen biwiyenaje kepeim manmâ gai. Yawu manmâ Anitâhât lohimbi orop biwiyenaje kepeiakmâ konohâk otmu manmâ gai. Otmu yengât den pat ya bukulipnaje eknohonetâ nângâm tep hero nângâyîngian. ¹⁶ Yawu nângâm Kutdânenje Yesu Kiristo âwânâit mepaeyelekman. Otmu Anitâje yuwu otyîngiâkgât ulitguman. ¹⁷ Awonnenje Anitâ lanjîje Ambonaje ikje Wâtgât mâmâjahât Heak hângângumu ge yengât biwiyenjan kionmu nângân nângânyene keterakyîngiwuap. Yawu otmu Anitâje tihityene otmap yakât topje nângâm hejengejum yâkâlen biwiyenaje kepeim mannomaihât yâk ulitguman. ¹⁸ Otmu Anitâje yen orop menenekmâ ikñan torokatnenekmu herone kakñan manmâ yâhâmbisâingât pat kuningiop. Pat yakât bulâje menomgât nângâm biwinnenje mem mansain. ¹⁹⁻²⁰ Otmu Anitâ Wâtgât Ambonaje ikje wâtñambâek Kiristo mumuñambâ mem yahalop. Otmu nen gurâ yawuâk mâmâje otningimu wâtñan kinmâ Kiristohâlen biwinennaje tijâk kepeim manmain. Yeje yakât nângânjetâ keterahâkgât nângâm Anitâ ulitguman.

Anitâje Kiristo mumuñambâ mem yahatmu yâkñe himbimân yâhâmu ikje orowâk tawot. ²¹ Himbimân orowâk tatmâ Kiristone Anitâhât hahit mem kinmâ anjelo himbimân tatmai otmu âi

weke, emet ambonje, senduk banearâ, susun me sâtje metje topje topje hânân yu tai kerek yengât kunyeje tatmap. Otmu emelâk embânân Anitâje hân himbim kândikyotgom âliwahap topje topje kalop ya orowâk Kiristohât amutgen tatmunje kunnenje tatmap. Otmu yawuâk kunnenje tatmâ yâhâwiop. Otmu sâp pesuk sâwuap yan hân himbim yu biatmu Anitâje hân himbim anjo kândikuwuap. Otmu sâp yan gurâ yawuâk kunnenje tatmâ yâhâmbisâp. ²² Yakât otmâmâ âliwahap kerehâkne yâkât amutgen tatbuapgât Anitâje sâm kalop. Otmu Kiristohât komot mansain nen gurâ yawuâk yâkât amutgenâk tatmunje kunnenje tatmâ tihitnenje otmâ yâhâmbisâpgât sâm kalop. ²³ Yakât otmâ Anitâje mâmâje otningimu Kiristo orop biwinnenjae kepeiakmâ konohâk otmap. Otmu nenje hoj bawanjmain yan yâkât lauje otmu kâjne bânje yawu otmâ nep mewanjim manmunje ârândân merândân otmap.

2

Anitâje mem hewewej tuhunenekmu Kiristohâlen biwinnenjae kepeim manmain.

¹ Emelâk Anitâje ki mem hewewej tuhuyekmu Kiristohâlen biwiyene katbi sâp yan yeje orotmeme bâlene topje topje otmâ tosa mem manminiwi. Yawu otbi yakât otmâ hiliwahonomaihât pat manbi. ² Sâp yan yeje engatyeneâk otmâ manman bâlenjahât mâtâp watbi. Yawu otmâ weke bâlene amboyenjae biwiyenan kionmu yâkât amutgen manmâ tem lâuwanjim manminiwi. Otmu sâp yuâmâ yâkne

lohimbi belângen mansai ya yengât biwiyenjan gurâ yawuâk kionmu Anitâhât den kumai. ³ Otmu yâkne Anitâhât den kum orotmeme bâleje otmai ya nenje gurâ yawuâk otbin. Yawu gârâmâ emelâk nen kerekne nenje engatnenjeâk watmâ biwinenjanbâ nângân nângân bâleje âlâlâ teteminiop ya watmâ otminiwin. Yakât otmâ Anitâje lohimbi kerek nenekmu ki ârândâj otmu hiliwahonomgât pat otbin.

⁴⁻⁶ Yawu otmâ manbin yamâ ikjahâk tepje nângâningim tihitnenje otmâ Kiristo hângângumu ge nengât toсахât otmâ kawenenjan kinmu kujetâ muop. Nenje yâkâlen biwinenje katbin yan Anitâje tosanenje pilâningim manman ânje ningimu yakât topje nângâm biwinenje huruj sâop. Otmu Anitâje yen gurâ yawuâk wawaeyekmâ tosayenje pilâm manman kârikjahât pat kuyingimu mansai. Yakât otmâ yen me nen hârok Kiristo orop biwinenjanje kepeiakmâ konohâk otmu mansain. Otmu sâp pato tetewuap yan Anitâje mumunambâ mem yahatnenekmu Kiristo orop himbimân yâhâ tatbisâin. Yakât pat kuningimu tap. Yakât nângâm engat yâhâp ki otmain. ⁷ Nenje Kiristohâlen biwinenjanje kepeimunje Anitâje kaok nângâningim tosanenje pilâmu biwinenje huruj sâmu lohotjan manmain. Otmu sâp yupâek lohimbiye yakât nângâjjetâ hâu sâsâ otbuap. ⁸⁻⁹ Yeje himbimân yâhâ manman kârikjan mannomaihât pat kuyingimu mansai. Yakât nângâm yehâhât nângâjjetâ yahatmu hâkyenje mepaemaihât yuwu sâmune nângâjjet. Anitâ ikjahâk wawaeyekmâ

tihityeņe otmâ Kiristo hângângumu ge yengât tosehât otmâ muop. Otmu yeņe Kiristohâlen biwiyeņe katņetâ Anitâņe tosayeņe pilâyিংim manman kârikņahât pat kuyিংimu mansai. Yeņe wâtyeņan ya ki mem tetewi. Yakât otmâ yeņahât ki nângâņetâ yahatmu mepaeaknomai. ¹⁰ Otmu yeņe Kiristohâlen biwiyeņe katbi sâp yan Ambonenņe Anitâņe manman âiņe yিংimu mem mansai. Yawu manmâ orotmeme âlepņeâk otmâ tânahom mannomaihât sâm kalop.

Kiristoņe nen lohimbi topņe topņe menduhunenekmu manmain.

¹¹⁻¹² Kiristoņe nen Yura lohimbi otmu yen pâku lohimbi mem menduhunenekmu komot konohâk otmunņe ikņak kunnenņe tatmap. Yakât topņe yuwu sâmunne nângâņet. Emelâk yen pâku lohimbiņe Anitâhât topņe ki nângâwi. Yâhâ emelâk embâņân Anitâņe Awarahamgât pat kuwaņgiop ya Yura lohimbi nengât gurâ yawuâk kuningiop. Yakât otmâ nenņe yengât nângâmunnē gemu yuwu nângâminiwin. “Nen Awarahamgât sen mansain yakât otmâ hâknennjahât torehenņan undip tuhuangimain. Yâhâ yen pâku lohimbiâmâ Awarahamgât sen ki oai. Yakât otmâ ketetyekmunņe belângen manmâ hâkyeņahât torehenņan undip ki tuhuangimai. Yakât otmâ Anitâņe hiliwahonomaihât pat kuyিংimu mansai.” Yeņgât yawu nângâminiwin. Otmu hâknennjahât torehenņan undip tuhuangiminiwin orotmeme yaņe ki tânnongomap. Yakât otmâ orotmeme yakât nângâmune tâņât otmap. ¹³⁻¹⁵ Otmu emelâk yeņe Kiristohât topņe ki nângâm

belângen manbi. Yâhâ sâp yuâmâ yâk orop biwiyenjaŋe kepeiakmâ konohâk otmu mansai. Yawu gârâmâ Kiristo Biwi kepeiak kepeiak Amboŋe ikŋak nen Yura lohimbi otmu yen pâku lohimbi kerek nengât tosanenŋahât otmâ kawenenŋan kinmu kuŋetâ muop. Muop yan yeŋe Anitâhât komolân torokatnomaihât mâtâp meyiŋgiop. Yawu olop yakât otmâ Anitâŋe yen orop kaok nâŋgâningimu biwinenŋaŋe kepeiakmâ konohâk otmu buku oraŋgimain.

Yâhâ emelâk embâŋân Anitâŋe girem den âlâlâ Mose ekumu kulemguop. Otmu Yura papatolipnennjaŋe yeŋe nâŋgân nâŋgân watmâ girem den yan den âlâlâ torokatbi. Otmu nenŋe den ya lâum yen ketetyekmunŋe yaehen manŋetâ yen orop kasa kârikŋe manminiwin. Otmu den âlâlâ torokatminiwi yaŋe undip kârikŋe olop. Yawu gârâmâ Kiristoŋe tosanenŋahât otmâ muop yan undip ya mem gahaem yen orop menduhunenekmu komot konohâk otmâ manmain. ¹⁶ Otmu Kiristoŋe tosanenŋahât otmâ kawenenŋan kinmu howanân kuŋetâ muop yan mem menduhunenekmu Anitâŋe kerek nengât kaok nâŋgâningimap. Otmu nenŋe biwinenŋe sânduk sâmu buku oraŋgim manmain. ¹⁷ Kiristoŋe yawu otningiop yakât den pat aŋgoân nen Yura lohimbi eknongop. Otmu nenŋe yâkât den ya torokatmâ yen kâsikum yiŋgim gain. ¹⁸ Yakât otmâ Wâtgât mâmâŋahât Heakŋe biwinenŋan kionmâ yen orop mem hewewej tuhunenekmu Kiristohâlen biwinenŋaŋe kepeimain. Yawu otmunŋe Kiristoŋe mâtâp mem teteningimu

âwâŋe Anitâhâlen biwinenŋaŋe kepeim mepaem mannom.

Nen Anitâhât sen otmâ mansain.

¹⁹ Emelâk nen Yura lohimbiŋe yen pâku lohimbi yekmunŋe kasa kârikŋe otmu keterakmâ ikŋiâk ikŋiâk manminiwin. Yâhâ sâp yuâmâ nenŋe yen orop manman bâleŋambâ keterakmâ orotmeme bâleŋe pilâm Anitâhâlen biwinenŋaŋe kepeim komot konohâk otmâ mansain. Yakât otmâ Anitâŋe menenekmu ikŋe sen otmâ mansain. ²⁰ Yakât topŋe nâŋgâŋetâ keterahâkgât emet tuhumain yan hâum sâmune nâŋgâŋet. Hân aim saran lâum kânâŋgâmunŋe kinmap yaŋe Kiristohât aposololipŋe otmu poropetelipŋe nengât dop oap. Otmu saran yakât kakŋan hohem katmâ kokore pilâm gârem kâwi huhum pilâmain yaŋeâmâ lohimbi menduhuakmâ Anitâ mepaemai yakât dop oap. Otmu kuhupin lâum kânâŋgâmunŋe ŋiwiŋ ŋiwiŋ sâm kinmap yaŋeâmâ Kiristo ikŋahât dop oap. ²¹ Otmu kuhupin kakŋan gimbâ katmâ geri kum pilâm losohomunŋe emet ya âilonŋo kinmap yakât dopŋeâk nenŋe Kiristohât komot konohâk otmâ yâkât wâtŋan manmain. Yawu manmâ Anitâhât opon kâmbukŋe yakât dop otmâ manmain. ²² Otmu emelâk Anitâŋe ikŋe opon kâmbukŋan ge tatminiop yakât dopŋeâk ikŋe Wâtgât mâmâŋahât Heak hâŋgâŋumu ge biwinenŋan tatmâ mâmâŋe otningimu manmain. Yawu otningimu biwinenŋaŋe kepeiakmâ konohâk otmu buku konok oraŋim manmâ yâhânom.

3

Anitâŋe Paulohât nâŋgân nâŋgânŋe mem pâron pilâwanŋiop.

1-2 Yen pâku lohimbiŋe Kiristohâlen biwiyenâŋe kepeim Anitâhât komolân torokatŋetgât Anitâŋe ikŋahâk nâŋgânihim aposolo âi nihimu mem mansan. Âi ya mem Kiristo hoŋ bawanŋim yâkât den pat âlepŋe ekyongoman. Den pat âlepŋe ekyongomune lok nombotŋaŋe den ya nâŋgâŋetâ gemu bet pilâm pâi emetŋan mem katnekŋetâ manmâ gan. ³ Emelâk Anitâhât biwiŋan nâŋgân nâŋgân âlâ nâŋgâm gaop ya nâŋgâmune keterahâkgât nâŋgân nâŋgânne mem pâron pilânihimu nâŋgâwan. ⁴ Otmu den yakât nâŋgâmune biwinambâ nâŋgân nâŋgân âlâlâ tetemap ya pâŋe tâlâwâk kulemgum katyiŋgian yu ekmâ nâŋgânomai. ⁵ Emelâk embânâmbâek Anitâŋe lohimbi âlâ me âlâhât nâŋgân nâŋgânyeŋe ki mem pâron pilâyiŋgiop. Yakât otmâ den yakât pâpŋuwi. Yawu gârâmâ sâp yuâmâ Anitâhât Wâtŋât mâmâŋahât Heakŋe den ya mem Kiristohât aposololipŋe otmu poropetelipŋe nengât biwinenŋan katmu nâŋgâmain. ⁶ Den yakât topŋe yuwu sâmune nâŋgâŋet. Nenŋe Yesu Kiristohât den pat âlepŋe yen pâku lohimbi ekyongomunŋe nâŋgâŋetâ bulâŋe otmu yâkâlen biwiyenâŋe kepeim mansai. Yawu manŋetâ Anitâŋe nen Yura lohimbi orop mem menduhunenekmu komot konohâk otmâ mansain. Yawu manmunŋe sâp pato tetewuawân Anitâŋe manman kârikŋahât pat yakât bulâŋe ningimu mem Yesu Kiristo orop heronŋe kakŋan tatbisâin.

⁷ Anitâñe ikñe engatñeâk otmâ menekmâ aposolo âi sâam nihiop. Âi ya mem yâkât wâtñan kinmâ Kiristohât lohimbi hoñ bayingim yâkât den lohimbi kâsikum yingiman. ⁸ Yâhâ emelâk yâkât lohimbi dondâ mem bâleyekminiwan. Yakât otmâ ninahât nângâmune gemu Anitâhât lohimbi yengât amutyenñan mansan yawu nângâmune otmap. Yamâ nâñe mem bâleyekminiwan yapâek Anitâñe menekmâ âi sâam nihimu Kiristohât den pat ya yen pâku lohimbi ekyongom gan. Yakât yuwu sâamune nângânjet. Kiristone wawaenenekmâ tihitnenñe otmu manmannenñahât bulâñe teteningimu biwinenñe huruñ sâamu manmain. Otmu yawuâk otningim yâhâwuap. Yakât topñe nenñahâk nângâm ba takanomgât dop ki tap. ⁹⁻¹⁰ Otmu girawu manmunñe Anitâñe nenekmu ârândân otmu manman kârikñahât pat kuningiwuap yakât den sâam holañmâ pâku lohimbi ekyongomune nângâmai. Otmu Anitâ Hân Himbim Ambonañe nen Kiristohât lohimbi kerek mem hewewenñe tuhunenekmu Kiristohât den pat sâam haok tuhonom. Yawu otnom yan Anitâhât biwiñan nângân nângân âlâlâ tatmap yakât bulâñe topñe topñe tetemu anelolipñañe ekñetâ âlâ kândâkdâ otbuap. Yakât nângâm emelâk embânâmbâek yâkñe lok âlâ me âlâhât nângân nângânnyene ki mem pâronñ pilâyingio. Yakât otmâ den yakât topñe pâpñguwi. ¹¹ Yawu otmâ ikñe nângân nângân watmâ sâpñe ekmu ârândân otmu Kutdânenñe Yesu Kiristo hângângumu giop yan den yakât bulâñe teteop. ¹² Nenñe Kiristohâlen biwinenñañe kepeim Anitâ pahâk ulitgumunñe nângânningiwuap. Yakât

nângâm nenje biwi yâhâp kakñan ki ulitgunom.
¹³ Nâñe Kiristohât den pat kâsikum yinjimune
 nâñgâñetâ bulâñe otmu yâkâlen biwiyeñaje
 kepeim mansai. Yakât otmâ lok nombotñaje
 pâi emetñan mem katnekñetâ manmâ gan. Nâñe
 yeñgât nâñgâm hâhiwin kakñan mansan yakât
 nâñgâm yeñe kârihem kinmâ biwiyeñe ki orotok
 sâwuapgât nanñan.

*Kiristoñe wawaenenekmap yakât Pauloñe
 kulemguop.*

¹⁴⁻¹⁵ Yen pâku lohimbiñe Kiristohâlen
 biwiyeñaje kepeim Anitâhât komolân torokatñetâ
 nen Yura lohimbi orop biwinenñaje kepeiakmâ
 konohâk otmu mansain. Anitâhât añelolipñe
 topñe topñe himbimân tatmai otmu âliwahap
 topñe topñe hânân yu kalop, ehekñe ki ehekñe,
 kerek nengât manmannenñe Awoñnenñe Anitâ
 ikñak ningimu manmain. Yâkñe nine nanne
 baratne sâñ menenekmu mansain yakât
 nâñgâmune hâu sâsâ otmu mepaeman. ¹⁶⁻¹⁷ Anitâ
 Manman Amboñaje koko salehâk tatmap. Otmu
 yu yakât ki pâpgumap. Yawu tatmap yakât
 nâñgâmune âlâ kândâkdâ otmap. Otmu nâñe
 yeñgât nâñgâm yâk ulitgumune ikñe Wâtgât
 mâmâñahât Heak hâñgângumu ge mem hewewen
 tuhuyekmu Kiristohâlen biwiyeñaje tiñâk kepeim
 tem lâuwangim mannomai. Yawu otñetâ yâk
 orop biwiyeñaje kepeiakmâ konohâk otmap
 yakât dopñeâk bukulipyenñe orop biwiyeñaje
 kepeiakmâ konohâk otmu buku orangim
 mannomai. ¹⁸ Otmu Kiristoñe wawaenenekmâ
 kawenenñan kinmu kuñetâ muop yakât topñe

nângânetâ keterakyiŋim heŋgeŋguâkgât Anitâ ulitguman. ¹⁹ Yengât yawu ulitguman. Yawu gârâmâ Kiristoŋe wawaenenekmap yakât topŋambâek nâŋgâm metenomgât dop âlâ ki tap. Yawu gârâmâ yeŋe yâkâlen biwiyenaje tiŋâk kepeim manŋetâ yanâmâ Wâtgât mâmâŋahât Heakŋe mâmâŋe otyiŋgiwuap. Mâmâŋe otyiŋgimu manmanyenahât bulâŋe âlâlâ teteyiŋgimu Kiristoŋe wawaeyekmap yakât topŋe nâŋgâm heŋgeŋgunomai. Manmanyenahât bulâŋe teteyiŋgiwuap yakât dopŋanâk âi mem Anitâ hoŋ bawanŋim manmâ yu yakât ki pâpgunomai.

²⁰ Anitâhât Wâtgât mâmâŋahât Heakŋe mâmâŋe otniŋim yâhâwuap. Yakât otmâ nenŋe Kiristo hoŋ bawanŋim nep âlâlâ memunŋe yakât bulâŋe tetewuap nâŋgâmain ya wangim tetewuap. ²¹ Yakât nâŋgâm Kiristohâlen biwinenŋe kepeim hoŋ bawanŋim manmunŋe bulâŋe âlâlâ tetemu ekmâ Anitâ mepaem manmâ yâhâmbisâin. Ya bonŋanâk.

4

Kiristo hoŋ bawanŋim tânahom mannom.

¹ Bukulipne, yuwu sâmunne nâŋgânet. Nâŋe Kiristohâlen biwinaje tiŋâk kepeim hoŋ bawanŋim yâkât den pat lohimbi kâsikum yiŋgiman. Otmu emelâk den ya kâsikum yiŋgimune lok nombotŋe nâŋgânetâ gemu bet pilâm pâi emetŋan mem katnekŋetâ manmâ gan. Otmu den ekyongomune nâŋgânetâ Anitâhât Wâtgât mâmâŋahât Heakŋe biwiyenaje mem hewewen tuhumu yapâek Kiristohâlen biwiyenaje kepeim

mansai. Yakât otmâ yâkât den ya tiñâk lâum manñetâ lohimbijê manmanyenê ekñetâ ârândân olâkgât nanjan. ² Otmu yenahât nânğâñetâ gemu huruñ huruñ manmâ bukulipyenê orop ewe karangim mannomai. Yawu manmâ buku nombotñenê nânğâm bâleyiñginomai yan biwiyenêñe kepeiyekmâ lohotñan otyiñginomai.

³ Sâp yiwerenê yuâmâ biwiyenêñe kepeiakmâ konohâk otmu mansai. Yawuâk torokatmâ manne sâmâmâ tihit oranğim biwi sânduhân mannomaihât nanjan. ⁴ Anitâhât Wâtğât mâmâñahât Heak ikñak mem hewewenñ tuhunenekmu Kiristohâlen biwinenñenê kepeim yâkât komot konohâk otmâ mansain. Yawu manmunñe Kiristo ikñak âwurem ge menenekbuapgât nânğâm biwinenñe mem manmain. ⁵ Kutdânenñeâmâ Kiristo konohâk. Otmu yâkât den konohâk lâum manmain. Otmu toen katnenekñetâ Kiristo orop biwinenñenê kepeiakmâ konohâk otmap yakât mâtâp konohâk tap. ⁶ Otmu Awonñenñeâmâ Anitâ ikñak kunnenñe pato tatmap. Otmu Anitâñe wosapâ me wosapâ ki tatmap yawuya âlâ ki tap. Yakât otmâ himbimân añelolipñe tai otmu hânân âliwahap topñe topñe kalop ya kerehâk hohem tatmu yâkât wâtñan tatmâ gamain.

⁷ Otmu Kiristonê ikñahâk biwinenñahât topñe ekmâ nânğâmap. Otmu Wâtğât mâmâñahât Heak hânğângumu ge biwinenñan tatmâ mâmâñe otningimap. Yawu otningimu manmannenñahât bulâñe ikñiâk ikñiâk teteningimap yakât dopñanâk âi topñe topñe mem Kiristo hoñ bawanğimain.

⁸ Den yan yuņe emelâk lok âlâņe Anitâhât den kulemguop ya miap. Den yamâ yawu tap.

“Lohimbiņe hoņ bawanņiņetgât yâkņe meyekmâ himbimân âwurem yâhâop. Yawu otmâ mâmâņe otyiņgimu âi meņetâ yan bulâņe âlâlâ teteop.” Den yawu tap.

⁹ Aiop, “himbimân âwurem yâhâop,” den yawu kulemguop. Den ya ekmâ yuwu nâņgâmain. “Anņoân himbimâmbâ ge hânân manmâ muop,” yawu nâņgâmain. ¹⁰ Otmu mumuņambâ yahatmâ himbimân âwurem yâhâmu Anitâ orop tawot. Yawu otmâ kunnenņe tatmâ mâmâņe otniņgimu yâkât lauņe, otmu kâiņe bânņe yawu otmâ hoņ bawanņinom. Hoņ bawanņim yâkât den pat sâm haok tuhumunņe hânņan kulemņan ariwuap. ¹¹ Yâkņe mâmâņe otniņgim âi ikņiâk ikņiâk niņgimu mem tânahom manmain yamâ yuwu. Lok nombotņe lohimbi belâņgen manmai ya yengâlen ari Kiristohât den pat âlepņe ekyongomunņe nâņgânomaiahât kut aposolo sâm âi niņgiop. Yâhâ lok nombotņeâmâ nen tânnongonetâ lohimbi Kiristohât den pat âlepņe orowâk kâsikum yiņginomgât kut bawapi sâm yiņgimap. Yâhâ lok nombotņeâmâ Anitâhât biwiņan den âlâlâ tatmap ya sâm holaņmâ lohimbi ekyongonomaihât kut poropete sâm âi yiņgimap. Yâhâ lok nombotņeâmâ Anitâhât lohimbi yengât kunlipyeņe manmâ yâkât den kâsikum yiņgim galemyongonomaihât kut pasto sâm âi yiņgimap. Yâhâ lok nombotņeâmâ pasto tânyongom lohimbi den kâsikum yiņginomaihât kut papasu sâm âi yiņgimap. ¹² Yawu gârâmâ

nenje Anitâ nanjahâlen biwinenñaje tiñâk kepeim mannom. Yawu manmâ âi ningiop ya mem lohimbi orop tânahom manmunje manmannenje kelihakbuap. ¹³ Yawu otmâ biwi nângân nângânnenñaje menduhuakmâ konohâk otmu Kiristone hânân manmâ olop miop yawuâk otmâ mannom. Yawu otmâ manmunje Anitâñe nenekmu Kiristohât dop yawu otbuap. ¹⁴ Yâhâ sâp yu manman girawu mansai yakât topñe nângâñetâ keterahâkgât yuwu sâmune nângâñet. Nimnaom titipâñe bukulipyenje orop engalân gianjim âwâ mâmâlipyenje yengât den kum ari malon manmai. Yenje yakât dopñeâk otmâ mansai. Otmu yakât den âlâen hâum sâmune nângâñet. Nenje wañga mem saru kakñambâ arimain. Arimainângembâ siru pato pilâmu to dondâ bâlemap. Yawu otmâ wañga ya mem kopa kopa tuhumap. Yakât dopñeâk lok perâkñaje Kiristohât den kelañgatmâ den perâkñe topñe topñe kâityongomai. Yawu otmâ nângân nângânyenje mem hâlim milim tuhuñetâ mansai. Yawu gârâmâ sâp yupâek yenje biwiyenje galemahom manñetâ manmanyenje kelihakbuapgât yuwu otmâ mannomai. ¹⁵ Bukulipyenje orop biwiyenñaje kepeiakmâ konohâk otmu Anitâhât den tâñ tâñâk watmâ den bulâñeâk alahunomai. Yawu otnomai yan manmanyenjahât bulâñe tetem gap ya wangim bulâñe pato tetewuap. Otmu Kunnenñe Kiristone manop yawuâk manne sâm yâkñe olop miop yawuâk otmâ mannomai. ¹⁶ Yakât nângâm yuwu sâmune nângâñet. Hâknennjeâmâ konohâk. Yawu gârâmâ Anitâñe ikñe enjatñeâk otmâ hâknennjahât

torehenne âlâ âlâ kalop ya watmâ âi ambojan ambojan tuhumai. Yawu otmâ manmammenne tetemu âlepne manmain. Aiop, Kiristone kunnenne tatmap. Otmu nenneâmâ yâkât laune, otmu kâine bâtne otmâ hoj bawaŋgim manmain. Yawu otmâ manmunne yâkne ikne hahit ningimu mem yâkât den tiŋâk lâum bukulpnenne orop biwinenne kepeiakmâ konohâk otmu tânahom manmain. Yawu manmunne manmammenne kelihakmu mannom.

Anitâne manman âine ningimu mem mansain.

¹⁷ Otmu yenğâlen gâtne lohimbi nombotŋaŋe pâku lohimbiŋe otŋetâ bâlemap yawu manmâ otŋetâ bâlem gap. Yakât otmâ nâne Kutdâhât sâtgât otmâ kuyiŋiŋetgât yuwu sâmunne nâŋgânet. ¹⁸ Pâku lohimbi belângen manmaine yeŋe nâŋgân nâŋgânyeŋe bâleŋe ya watmâ omoŋ kâlehen manmai. Otmu Anitâne manman âine nen ningimu mem mansain. Yakât topŋahât pâpgum biwiyeŋe kârikne otmâ hiliwahonomaihât pat mansai. ¹⁹ Otmu ekŋâleŋgim orotmeme kiŋoŋ maŋoŋ otneâk nâŋgâmai. Yawu otmâ aŋunyeŋahât ki otmai.

²⁰⁻²¹ Yâhâ nenne Kiristohât den ekyongomunne nâŋgânetâ bulâne otmu yâkâlen biwiyeŋaŋe kepeiwi. Sâp yapâek yâkât tem lâum orotmeme âlepneâk otŋetgât yâkât den bulâne kâsikum yiŋgimunne nâŋgâm gai. ²² Emelâk yeŋe nâŋgân nâŋgânyeŋe tâŋât ya watmâ senne âlâlâ ekŋâlem otŋetâ dondâ bâleminiop. Yawu manŋetâ nâŋgân nâŋgânyeŋe gulip malap otmu manmanyenŋe dondâ bâlemu manmâ gawi. Otmu orotmeme

bâleŋe otmâ mansai yaŋe mem bâleyekmapgât ya bunewâk bet pilâŋetgât naŋgan. ²³⁻²⁴ Yawu otŋetâ yanâmâ Anitâŋe biwiyenŋe mem hewewenŋe tuhum nâŋgân nâŋgân âiŋe, ikŋe yawuya, biwiyenŋan katbuap. Nâŋgân nâŋgân âiŋe biwiyenŋan katbuap ya watmâ yâkât den tem lâuwaŋgim biwiyenŋe galemgum heŋgeŋgum mannomai. Yawu manŋetâ manmanyenŋe kelihakmu Anitâŋe yekmu ârândâŋ otbuap.

²⁵ Nenŋe Kiristohât komot konohâk otmâ mansain. Yakât otmâ biwiyenŋe kurihiakmâ manŋetâ manmanyenŋe tawi tawiŋe otmapgât orotmeme bâleŋe ya betgum pesuk pilâm den bulâŋeâk alahum tihit oraŋgim mannomai. ²⁶ Yawu gârâmâ lohimbi âlâ me âlâŋe mem bâleyekŋetâ kuk otnomai yan Anitâhât den lâum in yawu kaok oraŋginomai. ²⁷ Yawu otmâ Satan Manman Bâleŋe Amboŋahât mâtâp maŋguwaŋginomai. ²⁸ Yeŋe lohimbi komborâ ekyongonŋetâ ki kombo tuhunomai. Yâkŋe âi mem manmâ yapâ hâmeŋe mem yeŋe tânahom nombotŋe kâsikum lohimbi umburuk mansai ya tânyongonomai. ²⁹ Den hako ki sahaŋginomai. Otmu bukulipyenŋe biwiyenŋe galemahom kârihem kinŋetgât mem hewewenŋe tuhuyekmâ den lohotaŋ ekyongonomai. ³⁰ Anitâŋe meyekmâ manman kârikŋahât pat kuyiŋgiop. Yawu gârâmâ sâp pato tetewuap yan pat yakât bulâŋe yingimu menomai. Yakât nâŋgâm enŋat yâhâp otmaiŋhât ikŋe Wâtgât mâmâŋahât Heak hâŋgângumu ge biwiyenŋan tatmâ mem hewewenŋe tuhuyekmu mansai. Yakât otmâ Wâtgât mâmâŋahât Heakŋe

tep bâle nângâyîngimapgât orotmeme bâleŋe ki tâtâem otmâ mannomai. ³¹ Yawu otmâ ki kuk otmâ sârehahom den bâleŋe hâiaknomai. Otmu ki nângâm bâleŋiŋetâ biwiyenŋe ŋasin otbuap. ³² Yâhâ yeŋe Kiristohâlen biwiyenŋe kepeim manŋetâ Anitâŋe tosayenŋe pilâyîngimap yakât dopŋeâk bukulipyenŋe orop tosayenŋe pilanŋinomai. Yawu otmâ ewe karanŋim lohotŋan oranŋinomai.

5

Manman bâleŋambâ keterakmâ Anitâhât tem lâuwanŋim mannom.

¹ Anitâŋe wawaeyekmâ nine nanne baratne sâm meyekmu mansai. Yakât otmâ yeŋe gurâ yawuâk bukulipyenŋe orop biwiyenŋe kepeiakmâ konohâk otmu mannomai. ² Kiristonŋe biwiŋenŋe kepeinenekmâ ikrŋe manmanŋe ki alilop. Yawu otmâ Anitâ âwâŋahât tem lâuwanŋim kawenenŋan kinmu kuŋetâ muop. Yawu otniŋiop yakât Anitâŋe nângâmu ârândânŋ olop. Otmu yeŋe gurâ yawuâk bukulipyenŋe orop biwiyenŋe kepeiakmâ konohâk otmu buku oranŋinomaihât nanŋan.

³ Yeŋe manman bâleŋe pilâm yapâ keterakmâ Anitâhât tem lâuwanŋim mansai. Yakât otmâ ki ekŋâleŋim kâwâ konda otnomai. Me bukulipyenŋe yeŋgât senŋe âlâlâ ki ekŋâlenomai. ⁴ Yâhâ orotmeme kiŋgoŋ otnomai yanâmâ anjun pato tetemu dondâ bâlewuap. Yawu gârâmâ bukulipyenŋe yeŋgât senyenŋan ki genomai. Me den imbiâk mambiâk ki sahanŋinomai. Yawu otmâ bukulipyenŋe yeŋgât nângâm Anitâ mepaenomai. ⁵ Lohimbi nombotŋenŋe senŋe âlâlâ ekŋâlem

biwiyenye yanâk kinmu yakâlâk nângâm manmai. Lohimbi yawu manmai ya yengât Anitâne nângâmu Porom Lâpiohâlen biwiyenaye kepeim mepaemai yawu otmap. Lohimbi yawu otmâ manmaine lohimbi kâwâ konda otmai orop Anitâne manman kâriknahât pat ki kuyingiwuap. Yakât otmâ yâkne Kiristo âwânâit orop himbimân ki tatnomai.

⁶ Lohimbi âlâ me âlâne den imbiâk sâm engatyenan genetâ orotmeme bâlene yakât nângânetâ bulâne otmapgât yuwu sâmune nângânet. Orotmeme bâlene âlâlâ sâm aran yu lohimbine otnomai yanâmâ Anitâne kuk otyingim matne amoknan yingimu menomai. ⁷ Yakât otmâ lohimbi yawuya orop biwiyenaye ki kepeiakmâ konohâk otmu tânahonomai. ⁸ Emelâk yene Anitâhât pâpgum omoŋ bâlenen manminiwi. Yawu gârâmâ ikne laŋinŋane biwiyenan pilâmu Kutdâhâlen biwiyenaye kepeim manmâ gai. Yakât otmâ orotmeme bâlene bet pilâm Anitâhât tem lâum mannomai. ⁹ Yawu otmâ mannetâ manmanyene kelihakmu yakât bulâne âlepneâk tetewuap. Yawu tetemu Anitâne manmanyene ekmu ârândâŋ otbuap. ¹⁰ Yawu gârâmâ yene manman girawu mannetâ Anitâne yekmu ârândâŋ otbuap yakât nângâm kiwilim otmâ lohotnan mannomai. ¹¹⁻¹³ Otmu lohimbine omoŋân ge hiliwahonomaihât pat mansai ya yengât manmanyeneâmâ tawi tawine. Yakât otmâ yâk orop ki buku oraŋginomai. Yâkneâmâ yok pilâm orotmeme bâlene topne topne oraŋgimai. Yakât nângâm anulakmaingât otmai yakât ki alahumain. Yâhâ nenne yu me yakât nângâmunne

haŋ sâningimap yakât topŋe tetekŋan tetemu ekmain. Yakât otmâ yâkŋe orotmemeyeŋe bâleŋe yakât nâŋgâŋetâ haŋ sâyingimu bet pilâŋetgât yeŋe den ekyongom engatyenŋan genomai. ¹⁴ Den ekyongonetâ nâŋgâŋetâ haŋ sâyingimu yanâmâ yâkŋe manmanyenahât topŋe tetekŋan tetemu eknomai. Yakât nâŋgâm kep yuwu meŋetâ nâŋgâmain.

“Kâlâwahom yahatne. Mumunambâ yahatne. Yawu otmunŋe Kiristohât lanŋnŋaŋe biwinenŋan pilâmu haŋ sâningiwuap.”

¹⁵⁻¹⁷ Anitâhât biwiŋan nâŋgân nâŋgân âlâlâ tatmap ya Wâtgât mâmâŋahât Heakŋe mem biwiyenŋan katmu nâŋgâŋetgât Anitâ ulitgunomai. Yakât otmâ girawu manŋetâ Kutdâŋe yekmu ârândâŋ otbuap yakât nâŋgâm kiwilim biwiyenŋe galemahom mannomai. Yâhâ sâp yuâmâ lohimbi nombotŋaŋe Anitâhât topŋahât pâpŋum orotmeme bâleŋe topŋe topŋe otmâ mansai. Yâhâ yeŋeâmâ yâkŋe otmai yawu ki otnomai. Yeŋeâmâ orotmeme âlepŋe orotgât mâtâp teteyiŋgimu lohimbi buku otyiŋŋinjetâ yâkŋe manmanyenŋe ekŋetâ ârândâŋ otbuapgât naŋan.

¹⁸ Otŋetâ bâlemapgât to kârikŋe ki nem biwi hâlim otnomai. Yawu otmâ Wâtgât mâmâŋahât Heakŋe biwiyenŋan tatmâ mâmâŋe otyiŋgiâkgât nâŋgâm mannomai. ¹⁹ Yawu manŋetâ biwiyenŋan tatmâ mâmâŋe otyiŋgiwuap yanâmâ biwiyenŋe heronŋe otmu Kutdâ kiki pali mewanŋim mepaem mannomai. ²⁰ Otmu yeŋe Kutdânennŋe Kiristo orop biwiyenŋaŋe kepeiakmâ konohâk otmu manŋetâ wuân me wuân teteyiŋgiwuap yan Awoŋnennŋe

Anitâ heronje nângâwanjim mepaem mannomai.
²¹ Otmu Kiristo ewe katmâ yâkât tem lâuwanjim bukulipyenje orop ewe karakmâ buku oranjim mannomai.

Imbilipyenje yengât sâop.

²² Imbilipyenje yengât yuwu sâmune nângânet. Kutdânenne Kiristone yengât kunyenje tatmap. Yakât otmâ yenje ewe katmâ loklipyenje yengât amutgen mannomai. ²³⁻²⁴ Yakât yuwu sâmune nângânet. Kiristone ikne lohimbi nen sâreerenekmâ kawenenñan kinmu kuñetâ muop. Otmu mumuñambâ yahatmâ kunnenne tatmu nenne yâkât amutgen manmain. Yakât dopñeâk imbilipyenjañe wuân me wuân otmai yan loklipyenje yengât amutgen manmai.

Loklipyenje yengât sâop.

²⁵ Yâhâ loklipyenje yengât yuwu sâmune nângânet. Kiristone ikne lohimbi nen wawaenenekmâ tosanenñahât otmâ kawenenñan kinmu kuñetâ muop. Yakât dopñeâk imbilipyenje yengâlen biwiyenjañe kepeim tihityenje otnomai. ²⁶⁻²⁷ Yakât otmâ yuwu sâmune nângânet. Sâp patoen nen Kiristohât lohimbine yâkât senñan tosa barak kinmunne menenekmâ onomlipne sâm ikñan torokatnenekbuap. Yakât nângâm tosanenñahât otmâ kawenenñan kinmu kuñetâ muop. Otmu nenne manman bâlenjambâ keterakmâ yâkâlen biwinenjañe kepeimain yakât topñe sâm tetemunne yanâmâ toen mem katnenekbi. Toen mem katnenekñetâ Anitâñe tosanenñe pirim salatak tuhuningimu yâkât senñan koko salehâk manmain. Yawu.

28-30 Kiristone ikne lohimbi nen nângâningim tihitnenne otmap. Yakât dopneâk loklipyenaŋe imbilipyene nângâyîngim tihityene otnomai yakât yuwu sâmunne nângânet. Lok âlâ me âlâne hakyenjan umatne wuân me wuân tetemapgât hâkyenahât tihitne otmâ galemahom manmai. Yakât dopneâk loklipyenaŋe imbilipyene yengât nângâm tihityene otmâ galempongom mannomaihât nanjan. Yâhâ loklipyenaŋe imbilipyene yengât nângâyîngimai yamâ yenhât nanjanngimai yawu oap. ³¹ Den yan yuŋe emelâk Anitâne Mose den ekumu kulemgup ya miap. Den yamâ yuwu tap.

“Lok âlâ me âlâne âwâne mâmâne pilâyelekmâ imbiŋahâlen torokatmu orowâk mandomawot yan hâkyetne konohâk otbuap.” Den yawu tap.

³² Otmu Mosenne den kulemgup yaŋe topne âlâlâ miop. Yakât nângâmune topne âlâ yuwu miap. Kiristone ikne lohimbi nen orop biwinenŋane kepeiakmâ konohâk otmu mansain ya. ³³ Otmu âlâmâ yuwu miap. Loklipyenaŋe yenhât nanjanngimai yawuâk imbilipyene yengât nângâyînginomai. Otmu imbilipyenaŋe loklipyene ewe katyeknomai.

6

Nimnaomlipyene yengât sâop.

¹ Otmu nimnaomlipyene yengât yuwu sâmunne nângânet. Yene âwâ mâmâlipyene yengât sâtyenjan tem lâuyîngim mannetâ Anitâne yekmu ârândân otbuap. ² Yâhâ emelâk Anitâne girem den âlâ yuwu sâm Mose ekumu kulemgup.

“Yeŋe âwâ māmâlipyeŋe yeŋgât nâŋgâyiŋgim denyeŋe lâum manŋet.” Yawu sâŋ ekuop.

Otmu girem den nombotŋe âlâlâ Mose ekumu kulemguop yamâ inâk sâop. Yâhâ topŋe katmâ girem den yan yu torokatmâ den âlâ yuwu sâŋ kalop.

³ “Denyeŋe lâum manŋetâ Anitâŋe nâŋgâyiŋgimu yanâmâ sâp kâlewâk mannomai.” Yawu sâŋ ekuop.

Âwâ māmâlipyeŋe yeŋgât sâop.

⁴ Yâhâ âwâ māmâlipyeŋe yeŋgât yuwu sâŋmune nâŋgâŋet. Nan baralipyenaye tepyeŋe bâlemu kuk otmaiât ki mem gin gondondoŋ katyeknomai. Yawu otmâ Kutdâhât den kâsikum yiŋgim galem-yongom heŋgeŋgunomai. Otmu mete pirik pirik otnomai yan lohotŋan kuwikyeknomai.

Âi lok yeŋgât sâop.

⁵ Yâhâ âi lok yeŋgât yuwu sâŋmune nâŋgâŋet. Kiristoŋe yen orop manmu yâk hoŋ bawaŋgimbâi yakât dopŋeâk lok kunlipyenye ewe katyekmâ tâŋ tâŋâk hoŋ bayiŋginomai. ⁶ Yâhâ âi ya galemŋeŋe yekmu ârândâŋ olâkgâlâk nâŋgâm hâkyenayeŋak ki tuhunomai. Âi ya tuhunomai yanâmâ Anitâhât den ya tâŋ tâŋâk watmâ Kiristohât tem lâuwâŋgim tiŋâk tuhunomai. ⁷ Yawu otnomai yan lohâk hoŋ bayiŋgiain sâŋ otnomai yamâ Kutdânenŋe hoŋ bawaŋginomai. ⁸ Yakât otmâ den yuwu sâŋmune nâŋgâm biwiyeŋan katnomai. Lok âlâ me âlâŋe lok kunlipyenye yeŋgât nep meyiŋgimai me yeŋe âi tuhuakmai yakât sâp patoen Kutdânenŋeŋe âi

memai ya ekmu ârândân otbuap otmuâmâ hâmeņe âlepņe yingimu menomai.

Lok kunņe papato yengât sâop.

⁹ Yâhâ lok kunņe papato yengât yuwu sâmune nângâņet. Anitâ Kutdâyeņe himbimân tatmapņe lok âlâhât nângâmu yahatmu âlâhât nângâmu gemu yawu ki otmap. Sâp patoen yâkņe lok kerek nengât biwinenņe ekmâ âlâku ikņiâk ikņiâk dopnenņan matņe kâpekningiwuap. Yakât otmâ hoņ bawalipyeņe kunlipyeņe ewe katyekmâ lohotņan hoņ bayingņetâ benņe kunlipyeņe gurâ topņe âlâlâ ki mângâyeknomai.

¹⁰ Aiop, yeņe Kiristo orop biwiyeņe kepeiakmâ konohâk otmu yâkât wâtņan kinmâ kârihem mannomai. ¹¹⁻¹² Nenņe Kiristohât den pat âlepņe lohimbi ekyongomunņe nângâmai hât lok bâleņe mâtâp maņguningim mansai. Otmu yâkņe konok bia. Satangât hoņ bawalipņe, weke bâleņe, emet amboņe, senduk banearâ, susun, âi weke, senņe âlâlâ sâtņe metņe topņe topņe, ya kerekņe mâtâp maņguningine sâm otmai. Yakât otmâ Satanne biwiyeņan kionmâ perâkņe topņe topņe kâityongomapgât Anitâņe wât yingimu kârihem kinnomai. ¹³ Yuwu otmâ kârihem kinņetâ Satanne hoņ bawalipņe orop mem ge katyekne sâm hâum pâpgum pilâyeknomai.

¹⁴ Nângân nângân bulâņe âlâlâ biwiyeņambâ tetemu den bulâņe sâm lohimbi târârâhâk ekyongonomai. Yawu otmâ yâk orop biwiyeņe kepeiakmâ konohâk otmu tihit oraņgim mannomai. ¹⁵ Otmu Kiristohât den pat âlepņe lohimbi ekyongonņetâ nângâņetâ

biwiyenê huruŋ sâekgât mâtâp teteyiŋgiwuap yan hewewenâk ekyongonomai. ¹⁶ Otmu Satangât hoŋ bawalipŋaŋe yenġât manmanyenê mem bâleyiŋgimaihât Anitâ yet Kiristo yetġâlen biwiyenêŋe tiŋâk kepeim mannomai. ¹⁷ Yawu manmâ Anitânê manman kârikŋahât pat yakât bulânê yinġimu mem Kiristo orop heronê kakŋan manbisâihât nânġâm enġat yâhâp ki otnomai. Otmu Anitâhât den ya lohimbi kâsikum yinġinetâ nânġânomai yan Wâtġât mâmânahât Heakŋe biwiyenê mem hewewenê tuhuwuap. Yawu otyinġimu den ya nânġânêŋetâ keterakiŋġim henġenġuwuap. ¹⁸ Otmu Wâtġât mâmânahât Heakŋe mem hewewenê tuhuyekmu yu yakât nânġâm Anitâ ulitġunomai. Yawu otmâ biwi golâ manmâ Kiristohât lohimbi kerek yenġât nânġâm haonmâ ârândânê Anitâ ulitġum mannomai.

¹⁹ Otmu Wâtġât mâmânahât Heakŋe den âlâlâ biwinan katmâ mâmânê otnihimu Kiristohât den pat âlepŋe pahâk ekyongomune nânġânomai. Otmu ekyongowom ya nânġânêŋetâ keterakiŋġiwuapġât yenê Anitâ ulitġunomai. ²⁰ Otmu lohimbi kapi âlâen âlâen manmâ arai ya yenġâlen ari Kiristohât den pat âlepŋe kâsikum yinġiwan. Kâsikum yinġimune lok nombotŋaŋe nânġânêŋetâ gemu bet pilâm pâi emetŋan mem katnekŋetâ manmâ gan. Yawu ġârâmâ nânê den pat âlepŋe lohimbi ekyongowomġât Kiristonê menekmâ âi sâm nihiop. Yakât otmâ nânê tem lâuwaniġim den ya pahâk ekyongom ki lohotŋe otbomġât Anitâ ulitġunomai.

Paulonê den bâiŋe sâm hâreop.

21-22 Aiop, bukunenŋe âlâ, kutŋe Tikiko, yâkŋe Kutdâhâlen biwiŋaŋe tiŋâk kepeim hoŋ bawaŋgim mansap. Otmu nâŋe bukulpne orop manman gi-rawu mansain yakât yâk hângângumune yengâlen takawuap yan topŋambâek ekyongomu nâŋgâŋetâ biwiyenŋe huruŋ sâwuap.

23-24 Otmu yenŋe Kutdânenŋe Yesu Kiristohâlen biwiyenŋe tiŋâk kepeim tem lâuwaŋgim mansai. Yakât otmâ Anitâ yet Kiristone nâŋgâyinŋim tihityenŋe otmutâ biwi nâŋgân nâŋgânyenŋe kepeiakmâ konohâk otmâ huruŋ sâekgât ulitguman. Bâiŋ.

Nâ bukuyenŋe,
Paulo

Yeshuât Den Pat Âlepŋe
The New Testament in the Selepet Language of Papua
New Guinea
Nupela Testamen long tokples Selepet long Niugini

copyright © 1986 Wycliffe Bible Translators, Inc.

Language: Selepet

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 11 Nov 2022 from source files dated 22 Nov 2019

995083d2-705e-5a60-af47-1e36806cccbc